

四庫全書

史部

欽定四庫全書

欽定勦捕臨清逆匪紀略卷十

癸未

舒赫德奏言臣前奏賊匪畏懼官兵有一二千人
豫行逃竄一節係臣等初至臨清傳聞之說現今
訊問獲犯據供二十三日賊人知官兵兩路進攻
因于舊城外東面派人五六百抵禦經官兵殺退
回城又城北塔灣一帶賊豫派人千餘在彼迎拒

臣舒赫德所帶之兵此項派出之人並未回城等語是賊匪一二千豫竄之說原屬風聞今按賊所供則所謂豫逃各賊即係塔灣迎拒之衆經春寧音濟圖先後殺死五六百人外楊景素在西河截擒百餘人并合鄉民解送三百餘人此時陸續擒獻者尚在未止但亦難保無漏網之賊現在各處鄉民執賊解送臣等已傳諭四鄉加緊查拏邀賞又查舊城外塔灣一帶為賊匪佔住安營二十三

日經音濟圖擊殺之後尚有餘匪盤踞未淨拉旺
多爾濟于二十四日言欲帶兵往捕並於附近村
莊巡勦殺賊五人臣舒赫德彼時以拉旺多爾濟
不過于就近巡捕並非迎賊打仗且離營不過數
里是以未令阿思哈同往至賊匪車輛原以裝載
家口輜重後從杏園搬入舊城即用以堵塞各巷
口并有安放一處者酌計大小車輛實有數百之
多經官兵放火焚燒後輪轆破折悉皆殘燬不全

縱橫滿地因非要務尚未辦及再查王倫並未充當馬兵現詢之兗州府知府福森布據稱並無其事即訊之現獲各犯亦未有王倫曾充馬兵之供所言自屬確實至朱兆龍名目再四詰訊賊營各犯亦稱實無其人且僉供逆首確係王倫其為王倫自知罪重希圖捏名混脫實無疑義又惟一格圖肯所帶滿漢各兵敢于臨陣奔逸自應嚴行緝拏將首先倡逃者即行正法以示懲儆臣等現俟

搜勦事畢即行查辦再德州滿兵中有新城一犯
脫逃經故城縣具報拏獲臣令解送德州監禁事
竣後提訊辦理并將未知下落滿漢各兵一體嚴
查不敢稍有姑息再查音濟圖擒縛王倫時持械
出拒之賊係被前鋒藍翎長哲森保射殺又有一
賊挺鎗來刺復被前鋒珠爾杭阿射斃理合附摺
奏

聞奏入

上諭內閣曰前鋒藍翎長哲森保前鋒珠爾杭阿俱屬奮勉著加恩交與該處遇有應陞之缺即行陞用

上命軍機大臣傳諭舒赫德阿思哈楊景素曰閱舒赫德等奏到益燦供單內稱二十八日子時閭吉仁同梵偉等帶領七八十人去攻壽張有入道之壽張衙役劉煥帶領二十個人爬城進內開門放進衆人等語劉煥身充縣役乃敢引賊爬城戕官害民甚為可惡斷不可令其漏網著舒赫德查已獲衆犯內有無

此人如尚未就獲即嚴密查拏到案訊取確供立即
凌遲示衆又供有王倫將吳清林李忠放為元帥領
兵之語吳清林已在昨日獲解各犯內其李忠曾否
同獲未據聲明亦即查明如尚未弋獲立行嚴拏解
京審訊看來臨清從賊之人諒必不少當就已獲各
犯追求拏完至舊城所有居民店戶若官兵到時尚
與賊同居此時賊敗經官兵拏獲者不可作脅從輕
宥即訊無助賊抗拒情由亦當遣發新疆及烟瘴等

處安插不當復留內地又孟燦供稱探得官兵到來時衆人商量派五百人在東門外迎敵又派千餘人往北門外打仗並據舒赫德奏豫逃各賊即塔灣迎拒之賊等語計賊一千五百餘經春寧音濟圖先後殺死六七百楊景素殲擒二三百又鄉民擒解三百餘此外賊匪尚有二百餘難保無竄脫之事且前奏衝橋而過者即有偽總兵楊壘之名其餘尚有受賊偽官者俱未可定著舒赫德同楊景素嚴切查拏凡

係送賊偽官尤不可任其倖免又據奏朱兆龍名目
詰訊賊營各犯均稱實無其人必是王倫自知罪重
希圖捏名混脫無疑等語果不出朕所料自可無庸
再究至音濟圖往拏王倫已經擒住欲縛被兩廂突
出十餘賊音濟圖猝不及備身受刀傷其綑阿爾圖
等八人亦俱受傷伊等出力之處朕已加恩獎賞但
音濟圖前往拏賊諒不止隨帶八人當賊衆搶奪逆
犯時豈無人攔護竟容匪衆傷人搶犯著舒赫德查

明如有彼時在場並未得傷不行救護者即行奏聞
究治此次逸出之賊不可不按數查拏勿使倖逃法
網阿思哈尚應帶兵各處搜拏務獲毋任遠颺但須
妥協詳辦不可使鄉僻小民稍有驚擾其惟一格圖
肯原帶潰逃之滿漢兵丁尚有未知下落者應即查
拏從重辦理

同日楊景素奏言臣會同正定鎮臣萬朝興天津
鎮臣永昌清河道單功擢督率將兵分佈運河西

岸連日因大學士舒赫德等搜捕河東甚嚴臣等
惟恐賊匪浮水偷逸所關匪細晝夜愈加防緝但
賊因西渡失利不敢復來連日止零星擒獲浮水
八人解送督臣究審三十日并聞大學士舒赫德
等已獲賊目梵偉王經隆孟燦等七人其首犯王
倫業已自焚臣仍嚴密防堵聽候行知遵照現在
居民紛紛挈眷還鄉運道亦清糧艘民船暢行無
阻奏入

上諭內閣曰此次逆賊王倫攻擾臨清其新城居民隨同地方文武盡力守禦得以保護無恙甚屬可嘉且嬰城固守半月餘作息經營不無荒廢生計未免拮据前諭該撫查明入告酌量加恩今逆匪現已勦除自應即數惠澤所有臨清新城居民本年應徵錢糧已納若干未納若干從前有無借欠未完之項並著楊景素查明奏聞候朕再降諭旨至舊城居民有甘心從賊抗拒官兵者自應同賊駢誅其為賊供役之

人即未拒敵亦當分遣新疆烟瘴以示懲儆其與賊
混處日久見官兵一到即行投歸者准照脅從罔治
已屬寬典自未便復令邀恩惟據楊景素奏現在居
民紛紛挈眷還鄉此等自係舊城百姓聞賊至即攜
家逃避者皆係守分善良事平後復還故土而舊居
闌闌或為賊匪焚燒或因攻賊殘燬生業蕭條室廬
蕩析殊堪憫惻自應一體加恩量為蠲復又壽張堂
邑陽穀三縣經賊擾害除現仍安居之戶無庸查卹

外其賊匪入城或人被賊戕或屋被賊燬及家計為賊搶掠者亦為可憫其應如何分別撫綏之處並著楊景素妥速查明具奏候朕另降恩旨以示軫恤該部即遵諭行

同日周元理奏言臣於三十日回至故城據楊景素萬朝興等將續獲各犯先後押解前來臣以二十三日自京兵圍勦焚殺至二十六七等日始行奔竄被獲者必係王倫親近匪徒其中要犯必多

臣隨親提嚴訊內有李之姚審係王倫妹夫搶劫
姦殺拒敵官兵趙瑤枝係陽穀監犯又江三張旺
唐洪禮馬德等共六犯俱係隨同逆匪攻城打仗
緊要逆兇恐有應需質訊之處因派遊擊全德帶
領弁兵沿途小心防護押解進京聽候審訊其餘
隨同搶劫抗拒官兵之犯一面審明一面正法分
別嚴辦另行具奏

同日姚立德徐績奏言臣等因聊城博平清平茌

平等縣毗連臨清屢出告示曉諭各處鄉民俱自行齊集守禦遇有面生之人立即擒拏解送九月二十三日我兵圍勦之後臣姚立德恐有賊匪畏死潛逃即於東昌守城兵內派撥百名放卡邀截嗣據管卡目兵楊寬等并聊城博平清平茌平夏津等縣及魏灣巡檢率領兵役鄉民陸續拏獲解到人犯共一百二十二名臣姚立德督同東昌府知府李世法暨在城委員晝夜隔別詳加推鞠并

令各犯互相識認均非緊要頭目內如入教從逆
打仗殺人或被脅隨行為賊守口探信或身充官
役被脅從賊或本係減流罪犯賊放隨行者共二
十五名均法無可貸即行正法訖又有被脅入教
隨賊趕車做飯牽馬者共十九名雖訊無助逆抗
拒搶劫等事但既聽賊指使亦未便輕縱臣等擬
即咨部發遣又審係臨清土著平民及在被貿易
乘間逃出避難並無從賊實跡者共五十九名臣

等面為宣諭即行釋放伊等感戴

皇上再造之恩伏地叩頭繼之以泣此外尚有賊營小頭目并賊黨眷屬以及甫經解到須細加確訊者共十九名現督東昌府等訊取供詞分別監禁聽候大學士舒赫德提審定擬并案辦理至現禁賊犯內有陽穀縣解獲之楊林一犯訊據供稱係壽張縣楊家溝人八月二十八日起事之日即攜眷入夥抗拒官兵并稱壽張縣蔡家樓張北魯係逆

犯王倫義兒向在河南裕州一帶傳播邪教聽說
二十四日賊營內差人往彼糾夥上臨清幫助等
語臣等查該犯所稱雖出自傳聞但不可不加意
嚴查臣等已飛札河南撫臣何燭密飭查辦據實
奏

聞再臨清賊匪業經殲除所有東昌一帶民情甚為安
帖臣等現將協同防守官兵酌量陸續掣回臣姚
立德因本年輸值小挑伏秋淤沙甚厚仍即親赴

臨清料理糧船并探量水勢深淺估計挑工合併
陳明奏入

上命軍機大臣傳諭舒赫德周元理何煇姚立德楊
景素曰楊景素奏稱居民紛紛挈眷還鄉是即係
臨清舊城避賊逃出者其情殊覺可憫已有明旨
交楊景素查明酌量賞卹此等還鄉之人是否全
係舊城居住抑尚有他處百姓在內亦著楊景素
確查妥辦至姚立德徐績奏陸續拏獲解到人

犯共一百二十二名分別正法發遣及宣諭釋放
所辦甚妥姚立德現在東昌該處所獲之賊自與
徐績無涉但逸賊既至東昌其為南竄可知恐尚
有未盡弋獲者著楊景素留心截擒勿使一犯漏網
或有竄入河南境者何燭並當一體偵捕至周元理
奏到解京六犯內趙瑤枝供有先鋒解陶閻吉祥之
名閻吉祥是否即前日已獲之閻吉仁其解陶曾否
就獲張旺供係楊進德徒弟楊進德現在作何下落

唐洪禮供係壽張林海徒弟馬德供係劉三徒弟林海劉三俱曾否就獲又李之姚供王倫妻母是無生父母能使雙刀等語無生父母四字義不可解前日被鎗打死之舞雙刀女賊據獲犯內認識者稱係烏三娘娘烏三無生轉音相近其使雙刀又同或即其人並著舒赫德查明覆奏再王倫母妻曾否就獲該逆犯有子幾人俱全獲否著舒赫德即行覆奏又聞姚立德奏到供單內毛榮供稱楚林孟一成歸岱都

是元帥等語梵林是否即係和尚梵偉孟一成是否
即係孟燦至歸岱一犯自係有名賊目現在曾否就
獲又犯供內供有頭目高珍之名並據高存良供派
在李達名下據楊二供被張祥逼脅入夥據郭二疤
眼供有郭進美騎馬領衆均應即速查捕訊究又據
楊大供有壽張壯役王士爵說王倫是主兒並壽張
倉房書辦龔盤佑請出本官令其降賊本官喊罵是
馬成龍動手殺害此三犯情罪尤為可惡必須嚴緝

務獲凌遲處死其解陶閻吉祥在堂邑緹打縣官復行殺害亦應處以凌遲重罪將此傳諭知之

甲申

上諭內閣曰此次往勦山東逆賊王倫等護軍統領春寧乾清門侍衛音濟圖納木扎爾巴圖保伊林俱各奮勇出力音濟圖已經降旨復還頭等侍衛並副都統職銜納木扎爾著遇有蒙古副都統缺出即行坐補巴圖保伊林俱授為二等侍衛所有從前春寧罰

俸三年之案並著寬免

同日嘉謨奏言查得臨清北水關停泊山東前幫回空糧船因在水次尚非受兌之時並無水手祇有舵工一人在船看守該幫領運千總辛振遠押空千總黃炳中聞有賊匪入境之信將船開放中流拋錨停泊不意九月十二日賊匪搶掠民船蜂擁而來竟將糧船搶去搭橋實係該千總等不能防守之罪請將該千總辛振遠黃炳中革職示儆

至被搶搭橋船隻今已燒燬無存臣現在行令山東糧道逐一查明數目開造旗丁姓名成造年分及將來作何著落賠造之處另行核議具詳容臣咨部辦理所有明春兌運新漕即暫催民船應用不致貽悞又本年浙江等省未過臨清各幫現在催令銜尾前進所有嚴州幫船現于十月初一日進關遙行其後接各幫俱已挽拉進關晝夜速趨南下至于各幫僱用短絳恐有竄脫餘匪改裝匿

照現在回空船隻押放下游何至被賊搶去乃一任停泊河中漫無經畫嘉謨汪圻實難辭辦理不善之咎況船隻既經燒燬即應賠修又何必再查成造年分此案被燒船隻即著嘉謨汪圻賠造如銀數較多一時不能賠出即著楊景素于藩庫內借項墊辦著落嘉謨汪圻按限補解歸款

同日舒赫德拉旺多爾濟阿思哈徐績奏言查臨清州逆匪雖已勦除但該州地方殘破太甚所有

一切善後事宜甚多必須幹員方克有濟該署州秦震鈞前因守城出力蒙

聖恩即以該員陞補臨清州知州臣等近日察看該員當此辦理繁劇之時恐不能肆應裕如查有現在隨營之肥城縣知縣李濤明幹結實仰懇

聖恩即以李濤陞署臨清州牧俟辦理事竣給咨送部引

見所遺肥城縣缺請將秦震鈞即以知州銜暫管縣印

俟東省另有知州缺出題請補授奏入得

旨允行

同日徐績奏言臣接奉

諭旨舒赫德現在督兵擒捕賊首徐績即應親身帶兵
分赴各村莊搜拏逸賊即邪教傳播之處徐績亦應
加意訪查勿存萌孽而被賊擾害之區並當酌為撫
綏以安善良乃竟安坐臨清毫無所事尚得謂之稍
有人心乎徐績著傳旨嚴行申飭並著明白回奏臣

跪讀戰慄無地自容伏查臣於九月二十三日與
阿思哈領兵至臨清會勦逆匪舊城周圍三十餘
里地面遼濶賊匪衆多處處必須堵禦截殺且拏
獲活口僉稱王倫現在城內臣與舒赫德等分投
勦殺搜拏晝夜不敢稍離迨賊勢漸衰惟逆首王
倫惡黨王經隆頭目孟姓及和尚梵偉俱未擒獲
臣焦急忿恨逐日同舒赫德等分路搜查凡夾牆
套屋地窖地溝無不拆看挖掘每日拏獲賊匪甚

夥二十四日又有臨清州河西回民三百餘名各執器械情願幫同殺賊臣商之舒赫德准其過河隨同殺賊回民頗為出力其原約回民洪四閭穀流內應一節二十三日進勦時未見照應訊據回民供稱洪四閭穀流二人並未見面未知生死等語臣查滿漢官兵并鄉勇回民連日殺賊難以數計其擒獲活口共有一千七百十六名內訊供處決者三百四十三名現在審辦者一千三百七

十三名二十九日始得擒獲王經隆等緊要頭目而逆首王倫未能生擒僅得燒死臣忿恨恐懼日夜不安至逐日領兵打仗搜殺餘賊實不敢片刻懈怠此皆舒赫德所目覩者若再安坐臨清不思黽勉自効臣何敢喪盡天良不畏

國法至于如此至于逆匪竄逸臣原已豫防查臨清

以東清平一帶最為緊要之路臣先派登州中營

守備張必捷帶兵二百名在吳家坊一帶埋伏據

報該營外委周國泰于二十三日殺賊七名奪馬
五匹二十四日有賊匪一百四五十名經過該守
備因其拒敵悉行殺戮二十五日又殺賊七名擒
賊五名其餘凡屬臨清可通路道臣商之舒赫德
飭令各州縣會同汎弁各帶兵役鄉勇層層密布
把守截拏連日據聊城博平清平茌平夏津武城
館陶等縣汎稟報殺賊匪二十五名擒獲活口解
東昌府審辦者一百二十二名又臣恐賊匪竄逃

先派梁山營都司洪燕哲後派叅將王晉分兵赴
運河西岸查拏如張四孤莊柳林杏園等處俱令
逐莊搜捕不使一賊縱逸是賊匪即有逃匿不死
于官兵即擒于鄉勇斷難遠颺至于傳播邪教亟
宜究追王倫之前必尚有倡首之人王倫之後必
又有遞傳之衆二十九日拏獲王樸經舒赫德訊
據王樸供稱王倫之師張既成係陽穀縣黃姑塚
人已死二年張既成妻弟張克印現在行道張既

成之師袁公溥係東阿縣馬山頭人王倫于乾隆十六年從張既成學道三十六年始收徒十八人內有張百祿上年往河南遂平縣傳道去了等語臣與舒赫德已飛咨河南撫臣將張百祿及其夥黨速行嚴密查拏并差弁赴東阿縣嚴拏袁公溥到案嚴究黨夥從重辦理至招集流亡酌議撫綏一切善後事宜臣現與舒赫德竭力經理事竣仍候

皇上治罪所有臣欽奉

諭旨悚懼奮勵情由及連日軍營辦理事宜謹繕摺覆

奏奏入

上命軍機大臣傳諭舒赫德楊景素曰徐績奏前後勦
捕情形頗為詳晰何不早為陳奏直待嚴行申飭始
奏及此逆匪王倫敢作不靖煽惑滋擾戕殺多人而
官兵勦賊時節次殲戮者更復不少此皆為梟獍逆
犯所害而賊首轉得倖逃寸磔實堪切齒該逆犯王

倫之子共有幾人自應即速查拏貸其重罪前已諭令舒赫德查明馳奏今尚未奏到現在獲解之逆黨王經隆等即日可到自可訊得其詳仍著舒赫德速即確查奏覆至各處所殺賊衆確數雖難盡知亦可約計而得著舒赫德同楊景素即速查明核數覆奏此等被殲匪犯通計雖不免大多然其死皆由自取亦無足惜至現在審訊之一千三百七十二犯其中如尚有曾受賤人偽官及其頭目並隨賊拒捕傷人

者仍當訊明正法不可姑息其曾經供賊役使及打仗時徒手隨行者雖無抗拒情形亦當嚴切訊明仍量其輕重分發伊犁及吉林黑龍江等處給兵丁為奴並烟瘴地方安插若訊明此內或有被脅愚民未能報出事後同賊跑走及年幼無知被賊掠去者自可量為審釋或視其情節較重者予以責懲再就徐績所奏各路陸續獲犯計之數頗不少是逸出之賊雖不能免而亦未必多如查訊已獲賊犯內供有曾

受賊元帥總兵等偽職之犯必須嚴緝務獲從重治罪不可聽其漏網至堂邑跪迎賊衆之入教男婦固屬可惡但事後查辦亦殊不易止可確查實在為首倡迎之人正法示衆其餘有可查考者分別發遣亦不必悉行窮究至東省白蓮邪教其傳甚久王樸所供王倫之師係陽穀張既成雖已身死其塚亦應發掘至張既成之師東阿袁公溥必須查拏嚴究而張既成妻弟張克印現在行道亦應拏獲重究其餘邪

教流傳支派實有可稽及行教已久者不可不逐一
查明勿使復留餘孽但邪教固當查禁而入教者未
必盡皆謀叛若被誘之人畏懼知改及未經供出者
亦不必過于蔓延總之搜查餘賊邪教二事不可不
期盡絕根株然亦不能太盡朕後殿自書仲尼不為
己甚之句舒赫德深知之惟當善體朕心毋縱毋濫
又據徐績奏登州營守備張必捷外委周國泰帶兵
在吳家坊等處埋伏擒賊逸賊情形果爾則該守備

外委尚屬出力自應量為獎賞若殺平民以為賊則不但無功抑且有罪且帶兵二百竟能殺賊一百四十恐所言未確而殺賊如許豈無活口存留自應訊係何處之賊至其後擒五賊現在更無難查訊並著舒赫德楊景素查明具奏至舒赫德等另摺所奏請將秦震鈞以知州銜改補肥城縣知縣以李濤陞署臨清州所辦甚是朕辦理庶政惟期于國事民生有益舒赫德能據所見直陳深得大臣之體朕亦不肯

因已經降旨稍有迴護至遊擊武靈阿舒赫德因其殺賊出力昨已奏補德州城守尉但城守尉所得官項較遊擊轉少是明陞其官而暗減其祿非所以示體恤著舒赫德再將武靈阿才具心地與臨清守城之德州營叅將烏大經秉公比較若烏大經勝于武靈阿即令烏大經陞補臨清副將其所遺德州叅將員缺令武靈阿陞補俱著舒赫德妥酌具奏

臣等謹按邪教為倡逆之由國典難寬

聖諭煌煌以查究固應絕根株而入教不同逆謀被誘
懼罪知改者不必過事蔓延其他被賊脅掠或
量為審釋或僅予責懲于除惡務盡之中仍曲
寓矜全之意洵為大中至正至于末弁微勞將
校祿入均為計及益仰
睿慮周詳無纖毫之不盡也

上又命軍機大臣傳諭舒赫德拉旺多爾濟阿思哈何
煇周元理曰豫省查拏逆匪王倫義子張北魯一事

應令何煇不動聲色妥協密辦至徐績奏王倫有徒弟十八人內張百祿一名上年往河南遂平縣傳道等語張百祿之名與張北魯音相近裕州遂平相距幾何其人是一是二均著何煇確查妥辦仍即行覆奏再豫省祥符陳留兩縣現有立會糾衆之事亦邪教之派別均當切實確查務使不遺萌孽亦勿涉張皇方為萬全無弊至京兵現無可用之事舒赫德可令拉旺多爾濟春寧帶領陸續緩程回京其沿途應

付事宜並著周元理豫為派辦阿思哈于歸途之便
並即前往滄州審案至東省應行查辦之事及善後
事宜有必須舒赫德親辦者自不得不自往稽查如
辦有端緒即可交與楊景素令其分晰妥辦舒赫德
彼時亦可即行回京周元理現在故城應與楊景素
札商如無須復行在境截拏餘賊即沿途查辦邪教
回省將此傳諭舒赫德等知之

同日舒赫德拉旺多爾濟阿思哈徐績又奏言竊

照逆匪擾害臨清首惡業經燒斃剝屍逆黨亦已
解京寸磔夥賊殺戮者甚多現審正法者亦夥臣
等現在掃除餘孽整飭地方惟因焚掠之餘良民
逃散招徠撫綏仰冀

聖恩謹擬善後事宜數條可否施行伏祈

鑒定

一查賊匪屯聚臨清舊城四出搶掠居民率多逃
避今聞賊已勒平遠近人民俱歸故土臣等現在

廣為出示曉諭俾逃難避賊之男婦大小人口俱速歸故鄉其有遠避別屬口食缺乏者地方官應行酌量資送

一查賊匪經過之處迫脅良民入夥其有不從者即殺其全家燒其房屋臨清舊城內因賊匪躲匿民居房屋多被燒燬今難民回籍無屋可住轉瞬寒冬露處可憫除行銷商賈及有力之戶無庸賞給房價外其實貧難之戶房屋被燒者應請酌給

修屋之費查賑卹定例草房每間五錢瓦房每間一兩今照每戶草房三間酌計每戶請給房費銀一兩五錢其有孤身男子及孤身婦女俱令男女分居以五人作一戶亦給房價銀一兩五錢令各謀棲止獲有寧居

一查難民回籍家中已無儲蓄口食難圖時屆寒冬難以傭工覓食仰懇

聖恩照被災十分極貧之例賞給四個月口糧俾嚴寒

之際不致飢餓至二月春融令各自行覓食查賑
濟定例應銀穀兼放今此等貧民情形較苦應請
動支倉穀及薊米以普

皇仁其家有儲蓄以及經營貿易書役人等逃亡歸來
者照例不准撫賑

一查臨清新城百姓隨同文武官員保護城池能
知大義已奉

特旨令確查在城各戶奏明酌量蠲免正供以示嘉獎

該民無不感激

天恩懽欣忭舞惟城外附近村莊民間牛驢車輛米穀
柴草多被搶掠家室蕩然一空此時力難輸納糧
賦應請將臨清州實在被害村莊令地方官確切
查明將本年錢糧緩至明年秋後起徵本年漕米
及民借倉穀麥本等項亦緩至明歲秋後分作兩
年帶徵俾瘡痍甫定之民咸被

皇恩更為罔極至附近臨清各州縣採辦軍需米麵豆

草已多供照時價採辦然民間蓋藏未免耗損可否將本年漕米及民借倉穀麥本等項一併緩至明歲秋後起徵分作兩年輸納則仰戴

寬大之仁實為無既

一查壽張陽穀堂邑臨清等處其首逆及有名賊目本身已經正法或臨陣被戮所遺房屋地土地方官應查明入官即親族律應緣坐及入教從賊之人或已殺戮或已正法發遣所遺房屋地土亦

一併入官令地方官逐莊查明估報變價入於本案動用

一查賊匪屯聚及經過之處搶掠民間牛馬甚多臨清舊城內守拒十八日所有牲畜或被宰食或被焚燒或已倒斃勦賊之後所存無幾且多係飢疲難資畊作明春東作之時農民買牛不易應請動支司庫銀兩飭發別處買牛五百隻解赴臨清聽小民各量種地之多寡報官領用取具保領註

冊存案俟一年之後令民將牛價交官解還司庫
庶不致有悞春耕以上六條皆係目前即應辦理
之事是否有當伏候

聖裁奏人得

有軍機大臣會同該部速議具奏

欽定勦捕臨清逆匪紀略卷十

欽定四庫全書

史部

欽定勦捕臨清逆匪紀畧卷十一至四

詳校官監察御史_臣劉芬

編修_臣裴謙覆勘

總校官進士_臣朱鈴

校對官編修_臣朱紱

謄錄監生_臣李金翅

欽定四庫全書

欽定勦捕臨清逆匪紀略卷十一

乙酉

上御西苑豐澤園

親訊逆犯王經隆王樸孟燦楚偉閻吉仁吳清林李旺
等於廷

同日舒赫德奏言查逆犯王倫罪大惡極今因情
急自焚倖逃寸磔其母妻子女自應一併擒捕駢

誅以彰

國法臣遇有獲到之犯即嚴加詰訊前據王倫之表
弟張發祥供稱王倫之母年七十二歲在臨清時
一同居住後因官兵於二十七日焚燒房屋逃走
出來見王倫乾塔李貴說你姑娘逃出來過河已
被官兵放鎗打死等語隨訊問李貴亦稱二十七
日見王倫屋內之婦女逃到河邊受鎗打死者甚
多想來王倫母親也在其內所以張發祥問及就

向他說等語至王倫正妻下落臣將王倫新擄之妻張氏訊問據供我是陽穀人於九月初被王倫搶至臨清他有正妻盧氏兩目雙瞽年約四十來歲官兵未到時我們總在一處住二十七日樓房火起屋內衆人紛紛喧鬧逃奔我也隨同出來至盧氏瞽目不能逃出自必被火燒死等語臣查王倫並無子女歷據獲犯所供皆屬相符至王倫之弟共有三人王真已經官兵殺死王樸前經拏獲

解京惟王樞一犯僉供耳上已受箭傷尚未就獲
現在各處查緝並出示曉諭居民人等有能將王
倫等各要犯親屬擒獻者重加獎賞如有隱匿者
一經查出與逆犯同罪並飭各州縣於四鄉盡力
搜捕以期必獲理合先行奏覆奏入報

聞

同日舒赫德又奏言臣查德州營叅將烏大經自
調赴臨清協勦賊匪初到之日正值逆賊攻城該

員登城擊斃賊衆曾奉

旨加銜一等及臣到臨清見其漢仗健壯人亦明白詢
係侍衛出身似尚能整頓一切現今署理臨清
協副將事務督飭安輯復業良民查拏存留逆匪
並嚴查舊城內有無火藥軍裝被賊搶掠之處諸
事頗能詳慎應請即將烏大經陞補臨清協副將
該員感激

鴻慈自當益加奮勉奏入得

旨允行

同日舒赫德拉旺多爾濟阿思哈楊景素又奏言
查合勒逆匪將次歲事所有山東副叅遊都等員
頗有應行更調另補者陞調既乏幹員部推又非
熟手臣等近日查看直隸泰寧鎮中營遊擊剛塔
正定鎮龍固營都司黃端帶兵來東頗為勇幹出
力請將該二員調往山東酌量補用於飭整營伍
實有裨益奏入得

旨允行

同日舒赫德拉旺多爾濟阿思哈徐績又奏言臣
等於九月二十三日進剿賊匪以來四面攻圍分
頭殲戮殺死賊衆不下一二千人其餘活拏賊犯
除將有名頭目孟燦等七名解京外現經官兵及
鄉民回民官役並直隸河南兩省擒捉送到者共
一千七百八十八名陸續交兗沂曹道松齡兗州
府知府福森布曹州府知府李絳嚴行審訊其實

係賊黨迎拒官兵及脅從後為賊打仗攻城者俱
法無可貸又自壽張陽穀堂邑三縣隨至臨清者
與賊聚處已久自非被勢迫脅亦難寬宥共計有
一千二百名已隨時訊明正法訖又訊出王倫王
經隆等親屬及頭目等四十一名俱係賊中緊要
人犯恐有應行解京者在內現將該犯等牢固監
禁候

旨遵行如無煩解京備訊當即分別凌遲斬決並將應

行緣坐之犯卽照例辦理又查出武舉劉陶文生
楊榮貴武生吳兆隆俱訊無從賊打仗情事而被
賊脅從之後該犯等卽羈留賊營不能以死自矢
實屬昧良無恥臣等亦將該犯等一併牢固監禁
候

旨至該教官學政等平日不能教束亦有應得處分再
容查叅具奏又其中有實係平民被脅並未從賊
打仗應行分別發遣釋放者共五百四十四名臣

等恐有要犯在內或致輕縱現諭該道等再行詳
鞠分別辦理毋致漏網再兩日舊城內地溝地窰
竟有潛伏躲避之賊俱經首告即遣官兵捕獲鄉
民亦尚有擒送者臣等並派文武各員於四處村
莊遍加擒捕不使稍留餘孽俟陸續送到即隨時
分別審擬具奏

同日舒赫德拉旺多爾濟阿思哈徐績奏言查河
西一帶係直隸河南接壤之地大兵進攻賊匪被

官兵勦殺無路即可由河西逃竄是以臣等於初
進兵時即議調直隸兵一千名由河西油坊一帶
協勦繼又以河之西南未免空虛又飛咨何謂令
其派兵至彼堵截防賊竄逸其河南兵未到之前
經臣徐績派山東綠營兵六百名青州滿兵二百
名先行防堵於九月二十四日曾經截殺逃匪副
因黃模等帶兵已到即將山東之兵撤回歸入臣
舒赫德等隊內派撥各處攻勦與直隸河南等兵

接連圍繞所以零星賊匪有逃竄渡河者卽經直隸河南兵擒獲至河北鎮總兵黃模處拏賊情形問據該鎮及河南城守尉七十九據稱帶領綠營兵九百名駐防滿兵二百名於九月二十四日辰刻至臨清舊城內運河西岸卽於頭道閘口起至二道閘口止將官兵沿河排列見河東有賊從牆屋內探望卽令官兵施放鎗礮此係隔河擊打其實死若干不敢妄報至午刻不見有賊探望卽於

頭道閘上架木二根差守備一員千總一員兵丁
三名由架木潛過對岸將河東房屋放火焚燒守
備等俱仍回至河西一帶堵截自二十四日夜間
起至二十七日等夜陸續浮水過河之賊經防守
河沿官員擊斃河內者三十餘人其浮至河沿被
官兵俘獲者五十三名並無一人走脫等語謹據
實查

奏奏入報

聞

同日舒赫德拉旺多爾濟阿思哈徐績又奏言臣等詳查音濟圖等於九月二十九日帶領滿洲官兵及山東弁兵在舊城一路勦賊搜至汪宅探知王倫在內音濟圖率衆直入樓下見王倫持劍站立堂屋門首音濟圖等隨以大兵已四面圍勦速行自投免死之語喝令出來王倫將劍放下往前略挪一步音濟圖直前擒捉并有臨清營把總仙

崔林揪住辮髮沂州營外委郁廣業用手抱住即將王倫拉出門外衆人一擁向前正欲綑縛隨有夥賊十數人突出搶奪刀槍並舉音濟圖及善射手綑阿爾圖等受傷把總仙崔林項後亦被刀傷力不能支仍被衆賊搶去是當日搶捉王倫時把總仙崔林外委郁廣業二人實為奮勇出力今音擠圖等俱已仰沐

聖恩該弁等亦應量加陞用以示獎勵謹將仙崔林郁

廣業交臣徐績遇有千總缺出即行陞補理合具
奏奏入報

聞

同日

上命軍機大臣傳諭舒赫德周元理何燭楊景素曰東
省解送逆匪王經隆等七犯到京朕親加刑訊並令
軍機大臣會同刑部覆加訊問據供王倫義兒共十
八人除王經隆即王聖如已經解到李世傑一犯前

據舒赫德奏被火燒死其餘如已獲之閻吉祥李桐
如尚未正法即行解京此外十四犯著舒赫德查明
已獲若干未獲若干其未獲者並令周元理何燭楊
景素等一體嚴緝又林哲係王倫義弟李貴係王倫
乾壻李貴並與王倫相隨三年代為傳話必須解京
嚴訊又據逆犯供有臨清城內開藥鋪人王倫封為
御醫並著查明果有其人即行查拏究治再據供國
太一犯帶領七八百人先往北門逃去其人作何著

落並著查明覆奏又據供惟一格圖肯於十二日打
仗賊人向前直衝官兵即已退回此等怯懦官兵實
為可恨若惟一等彼時能整隊不動手刃數人衆兵
自不敢輕退此固惟一等之無能速死而官兵如此
潰逃亦豈可不查明嚴辦著舒赫德楊景素即速訊
出為首倡逃者十餘人正法示衆其餘隨同奔潰者
發伊犁等處給兵丁為奴以示懲儆

同日何燭奏言臣接據河北鎮總兵黃模稟報二

十四日由右園赴臨清遇有逃竄賊匪殺死二名
擒獲十一名就近解赴山東軍營收審二十五日
大學士舒赫德瓜令在臨清城西南緊要開口防
範堵剿隨將滿漢官兵分布開口親身督率將弁
兵丁晝夜防堵截殺連日又殺死賊匪十四名擒
獲男婦四十二名口內有賊頭目一名閻吉仁搜
出元寶一錠腰刀槍劍六件至擒拏賊匪之時裏
城營外委把總崔士吉被賊刀砍殞命此賊亦官

兵殺死所獲賊匪俱先後解交山東軍營其閭吉
仁一犯業經大學士舒赫德訊明解京謹將該鎮
等所報殺獲賊匪名數據實具

奏奏入得

旨崔士吉著咨部予卹

丙戌

周元理奏言據楊景素等陸續解到拏獲逃匪經
臣將應行質訊要犯解京隨提餘犯逐一嚴加鞠

訛審得楊得旺于文德閣端智宋宗楊夫傑宋全棟張宗安何相玉梁起祿戴成一鄭良玉十一犯屢次攻城打仗拒殺官兵實為罪大惡極均應凌遲處死陳得榮李學孟任文成李見白趙懷亮張夫有楊三石煥劉建李四田孔詹劉國祥十二犯隨同逆匪攻城打仗搶劫多次亦屬助逆濟惡均應斬決其楊成名許占茂孟學仁張友孫見喬連閻集賢曲六八犯雖據堅供並未攻城打仗但各

犯為賊守口趕車辦草情實可惡亦應一律斬決
此外有鄭丕節石發二犯為賊拘迫供役未久實
未隨行抗拒官兵反復詰訊矢口不移應將該二
犯酌撥伊犁給與種地兵丁為奴又劉海青牛明
二犯訊據堅供二十五日往河西探聽官兵殺賊
信息因形跡可疑被拏家內現有隣佑親屬可訊
等語但該犯一面之詞殊難憑信應將二犯押解
東省傳喚隣佑家屬審明辦理查楊得旺等應行

正法者共三十一犯業經嚴訊明確未便稍稽顯
戮臣即將該犯等綁赴市曹分別凌遲處斬梟示
訖再尚有續解到各犯臣現在逐一詳細審辦另
行具

奏奏入報

聞

丁亥

上命大學士九卿科道會鞠王經隆等於刑部

臣等謹按逆匪以中土編氓敢作不靖惡積禍
盈寸磔不足蔽辜賊首王倫雖逃顯戮而焚斃
剄屍凶孽之報炯戒昭彰至如擒獲要犯王經
隆等黨惡助逆罪不容誅

特命解京

親鞫盡得實情且

諭大學士九卿科道於刑部會鞫使其罪狀暴著明伏
斧鑕以申國憲而快人心所謂

天討有罪與衆共棄者也

同日

上諭內閣曰此次派往山東勦捕賊衆之京兵等均能奮勉出力迅速蒞事尚屬可嘉著加恩將已領之一月鹽菜口糧全數賞給無庸按日扣繳其應如何辦理之處並著該部另行具奏

同日舒赫德阿思哈楊景素奏言查劉煥身充縣役引賊爬城一事臣等先已聞知即嚴行緝捕現

又特派官弁盡力查拏至李忠在賊營中曾任元帥帶兵李浩然招引康三八夥俱屬情罪重大法無可貸之犯李忠已經直隸拏獲現差人查詢李浩然一犯亦已專差員弁嚴行查捕此外並有王樞歸太等緊要親屬夥黨未經就縛定應一併擒捕以淨根株臣等現與楊景素商酌派叅將尚維寶洪哲燕並千總外委等於附近州縣鄉村分為六路嚴拏務獲至臣等自攻勦賊匪以來共獲犯

一千七百八十餘名已經正法者一千二百名除
將要犯監禁臨清留訊外尚有應行分別辦理者
五百四十四名因臨清新城地方偏窄恐拘聚一
處或有疎虞因即派撥兵役分押附近之東昌聊
城德州茌平恩縣高唐平原等各府州縣監禁現
委道府州縣分頭審問詳訊該犯等確實供詞再
行定擬具奏並將現在未獲賊黨親屬各要犯姓
名開付各員令於嚴鞠時留心核對如尚有緊要

黨目混雜其內即應嚴行根究毋稍輕縱再查音
濟圖擒拏王倫之日王倫潛踞汪宅屋內滿漢官
兵無不人人自奮冀縛逆首以成大功故屋外牆
上俱有兵分佈惟該犯所住之院僅容一二十人
駐足所以王倫見面音濟圖等即一擁上前奮擒
遭賊砍傷奪去屋上之人不能即時下救實無在
場不行救護之人至大兵剿除逆匪之後居民無
不欣躍感頌思安故業現據臨清協稟報自天橋

以南至錫馬市大街以及頭閘口止已經回家民
戶共一千二百八十六戶男婦大小六千二百八
十口鄉村亦漸歸舊宇臣等復四路差員出示安
輯今若復令阿思哈帶兵各處搜捕誠如

聖諭鄉僻小民轉有驚擾且現在亦無成羣之賊是以
臣舒赫德未令阿思哈前往惟現派徐績酌帶弁
兵前往壽張一帶安撫居民順查餘黨併各要犯
親屬謹據實覆

奏奏入報

聞

同日舒赫德奏言臣前奉

諭旨將協同擒拏王倫以致負傷之音濟圖綑阿爾圖
等九人各賞銀一百兩欽此臣驗看伊等傷痕音濟
圖綑阿爾圖塔堪保準德保色楞萬挺額爾登保
各得有腰刀長槍烏鎗傷不等自應賞銀一百兩
至色爾固美烏爾固爾濟僅有衣服浮傷並未傷

及肌膚若與音濟圖等一體賞銀百兩稍覺過優
應量為酌減各賞銀五十兩是否有當伏候

訓示奏入得

旨允行

同日舒赫德奏言臣前奉

諭旨察看姚立德是否奮勉圖報有無躲閃脫滑情形
臣至山東時姚立德徐績俱在東昌辦事至徐績
赴臨清後姚立德留駐東昌看其經理諸事尚屬

詳慎黽勉理合據實覆

奏伏祈

聖鑒奏入

上諭內閣曰姚立德前於聽受太監高雲從囑薦伊弟高雲龍充當長隨一事本應重治其罪因其經理河工修防事宜尚能妥協是以僅予革職摘去翎頂仍加恩留任以觀後效迨東省有壽張奸民聚衆之案該督即帶標兵協同徐績會剿甚為黽勉且以其現

在帶兵若無翎頂恐一切呼應不靈因降旨暫准戴
用當姚立德未至東昌之前曾諭以勦賊非其責任
令往潘家屯會勘引河彼時未知姚立德防守東昌
也繼知其人在東昌不便遽離復降旨止其南行姚立
德接奉前旨自應審度輕重奏留東昌辦理勦捕賊
匪之事乃奉到諭旨即起身前赴江南勘河幸行未
數里接奉後降之旨仍即趕回東昌然其初心安知
不因徐績漫無主見調度失宜恐為所累故藉端為

脫身之計耶第究無實據朕不肖為誅心加罪之事而所給翎頂則仍應革去然其過亦止於此朕於臣工功過惟核實以歸平允從不稍涉顛預將此通諭知之

同日周元理奏言據楊景素永昌等續解到拏獲逃匪內有緊要人犯臣即先行提訊審得徐天一張雨趙行俱受偽號將軍于秀受偽號先鋒該犯等俱係堂邑人隨同逆首搶劫壽張陽穀堂邑攻

打臨清屢次抗殺官兵實為逆匪要犯恐有應須
質訊之處臣即派委都司李肇岐帶領勇幹弁兵
將該四犯嚴密押護星速解京以備審訊其餘各
犯臣現在逐一詳細訊明另行分別辦理具

奏奏入報

聞

上命軍機大臣傳諭舒赫德楊景素曰本日將逆犯王
經隆等命大學士九卿科道審訊據王經隆及梵偉

供攻打臨清時有臨清武生吳兆隆曾設計用車裝載秫稻火藥焚燒南門梵偉並供聞得搶船搭橋亦有吳兆隆在內訊之李旺據供吳兆隆年約五十餘歲在舊城小市居住常趕集上店賣藥其子吳士偉約三十歲等語吳兆隆身係武生甘心從賊且為之設計焚燒城門搶船搭橋實係罪不容誅著舒赫德楊景素迅即嚴拏並其子一併派員飛速解京毋任竄逸漏網仍嚴飭解員沿途小心押解勿令自戕

上又命軍機大臣傳諭舒赫德周元理楊景素曰據解
到各犯供出有季國貞一犯帶人搶佔糧船并據供
係住臨清河西車沿子地方又國太一犯據供亦住
河西著舒赫德等即速查拏解京至所奏李忠係賊
營元帥拏獲時亦應解京審訊又據梵偉供有南臺
寺和尚慧林亦係在教訊之王經隆云慧林已經縊
死恐其說未確並著舒赫德等一併訪拏覆奏再周
元理奏到獲犯供單內有張明陳得貴皆係賊目劉

法係賊黨羽皆不可輕宥並令周元理楊景素查拏
解京毋任漏網

欽定勦捕臨清逆匪紀略卷十一

欽定四庫全書

欽定勅捕臨清逆匪紀略卷十二

戊子

上命大學士九卿科道覆鞫逆犯王經隆等於刑部

同日楊景素奏言十月十五日接奉

諭旨查辦被賊擾累良民加恩分別撫綏仰見我

皇上念切民瘼拯困安良之至意臣遵

旨即飭臨清州知州速查新城舊城民欠各年新舊錢

糧銀穀各數據實開報一面稟商大學士舒赫德
飭委同知龔孫枝知縣張鳴鐸等十員分赴臨清
舊城及被災鄉莊將屋被焚燒家被搶掠之戶確
切查明其壽張陽穀堂邑三縣城鄉被賊擾害之
戶亦一體查明酌議撫綏請

旨遵行臣查此時以撫恤難民搜查逸賊為要臣於初
三日派叅將尚維寶等六員赴壽張汶上恩縣東
平東昌衛等處指名搜拏賊夥賊眷初四日委秦

安府知府朱孝純等五員赴聊城德州茌平高唐平原等處審辦分羈餘賊今復委同知龔孫枝等十員稽查難民戶口豫備撫恤事宜所有審事查災各員臣俱令其順路查拏賊匪餘黨以及邪教蹤跡武職則明加躡捕文職則暗地訪查仍各慰諭良民不致驚恐奏入報

聞

同日舒赫德阿思哈楊景素奏言查訊臨清協副

將葉信供稱九月初三日調赴壽張勦捕即帶兵二百名起身初四日至李海務聞賊衆將到東昌復回至東昌守禦初五日聞堂邑被殘賊匪即至臨清葉信刻即帶兵星馳於五更時回臨清當即點集兵丁期勦賊衆但舊城兵少地寬既恐難以保守又慮難以取勝若僅守舊城而新城倉庫監獄轉有疎虞獲罪更大因於初六日午後進城協同守護實無暇料理葉信家口至初七日家口見

賊匪往攻新城，纔逃往河邊，見有運糧千總趙亮在船，因即上船逃命。並非葉信豫先安置等語。查舊城設有副將衙署，葉信自宜於所駐地方率兵防堵，保護居民至萬不能支之日，再率民衆避入新城。乃因新城現有倉庫監獄，竟將舊城棄而不顧，致逆賊得以佔據，擾害實屬自取重罪。除行文河南巡撫查訊千總趙亮是否與葉信先行商定，接取家眷上船，務得實情辦理外，相應請

旨將葉信照例擬斬監候秋後處決奏入得

旨三法司核擬具奏

同日舒赫德奏言本月初五日有直隸清河縣紳士里民康仲叔張果行謝眷美等呈稱仲叔等生逢

盛世久沐

昇平昨以壽張縣奸匪王倫侵擾臨清運河西北逼近賊巢之村落居民深虞殘掠今蒙

皇上天恩命重臣帥師遠至數日之內焚渠殲黨俾接
壤閭閻得安作息敬獻草五十袋料豆二十石粟
米二十石牛四隻猪十口羊二十隻錢五十千稍
盡芹私以助犒勞各兵之用伏乞鑒納不勝欣望
等語臣即傳康仲叔等面見諭以

皇上以逆匪王倫滋事不法殘害平民

特命本閣部堂統領京兵前來勦捕今爾等感激

皇恩情殷愛戴叩轅饋食具見悃忱惟歷來大兵所至

一切軍需皆支

帑項絲毫不累民間屢經出示曉諭諒爾等亦所深知所有錢米牛羊等物無煩將獻可即領回至爾等區區之誠本閣部堂俱已鑒悉爾等俱係

國家良善百姓當茲化日光天各宜安分守己無為異端所惑倘有匪人暗布邪教惟爾等知之最切即應赴官告發早杜奸邪苟能如此遵諭力行即較此時之備物輸誠實逾數十倍也康仲叔等均

感激

聖恩叩頭去訖奏入報

聞

同日舒赫德阿思哈楊景素奏言臣等前在德州
時據直隸故城縣稟報盤獲德州滿兵新城一名
當令德州知州李燕提取監禁今據該州將新城
解至臨清嚴訊據供係德州駐防披甲九月初六
日城守尉格圖肯派滿兵二百五十名赴臨清勦

賊十二日下午與惟總兵會合其時尚未札營聞賊在北門外攻城惟總兵格城守尉就分帶滿漢官兵前往殺賊見有三百餘賊官兵放鎗擊打賊人始猶躲避繼則一擁衝前官兵隨即奔跑我在河沿行走被賊追趕腿受鎗傷我跳在河裏被回民撈起十三日早到鄭家口正欲找赴營盤當被故城縣衙役盤獲等語查新城於潰散之後奔往河西顯係竄逃被獲其仍欲找回營之說殊難憑

信相應請

旨照逃兵例即行正法以示炯戒理合奏

聞

同日舒赫德阿思哈楊景素奏言查解陶為賊宣
行閭吉祥係閭吉仁之兄為賊義子早經官兵拏
獲現在監禁臨清楊進德即楊峻德亦係賊宣行
被獲監禁臣等親提嚴訊並無徒弟張旺至林海
劉三於現獲各犯中查對並無此二犯姓名臣楊

景素已飭屬訪拏又查據厯獲各犯供稱賊營中有奉無生教之婦女即自稱為無生娘因無生與烏三轉音相近遂爾悞稱前此擊斃使刀之婦即其類也王倫之妻母楊氏昨據王倫之妻姪盧高供並非無生母亦未跟從王倫臣等現差員赴壽張確查楊氏下落再行覆奏又查樊林即係和尚梵偉前經解京備訊益一成姓名賊中實無其人是否即係孟燦尚容確訊惟歸岱一犯厯據衆供

俱稱要賊已屢諭將弁等留心擒捕毋任遠颺至
李達係賊中小頭目於二十三日官兵到後投出
據供伊名下所管之人並無高成良至引人入教
之高珍亦係賊中小頭目現在不知下落張祥即
已獲之張立祥為賊中探馬至郭進美一犯查閱
東昌獲犯內有曹文科供係隨郭濟美之人已被
鎗傷身死似即郭進美但其果否被鎗擊死之處
俟解到曹文科時再行嚴訊又查馬成龍一犯前

曾拏伊父馬玉據供馬成龍已受鎗傷身死馬玉亦經正法惟王士爵冀盤佑二犯情罪俱屬可惡現在臣楊景素飛派文武幹員前往查拏理合先行奏

聞奏入

上命軍機大臣傳諭舒赫德周元理何燭楊景素曰楊峻德不過尋常賊黨止須在該處斬決其解陶係賊元帥閻吉祥係賊義兒張立祥係賊探馬均屬案內

要犯應仍押解進京又現據王經隆等犯供有國太
為賊宣行且為賊上京探信山東語音讀國如歸似
即歸岱質之李旺據供國太係壽張人年三十餘歲
均著舒赫德楊景素查訪明確即速拏獲一併解京
審究又現在訊據李旺供王經隆糾衆入夥時係蕭
連城為之糾約張居仁為之記賬並著楊景素即速
嚴拏從重辦理又據舒赫德奏審擬葉信一案果如
所供似當日專心為公並不顧家但恐其事後遁詞

卸過朕思葉信若九月初五六日並未回署自無暇
照料家口如曾回署內即不得謂非豫先安置著舒
赫德就近查詢明確並著令何燭查問千總趙亮是
否與葉信相商抑係葉信家眷自行上船之處令其
據實供明覆奏又據舒赫德奏有直隸清河縣紳士
里民康仲叔等備物呈獻深明大義甚屬可嘉著傳
諭周元理查明量為獎賞其倡率之人并著賞給扁
額以示獎勵又向聞東省回民最為悍狠不法而此

次勦捕賊匪回民甚為出力如洪印洪全等率領回
兵奮勇殺賊白虎等曾招回人効力頗能知禮奉公
並堪嘉尚著楊景素遵旨出分別獎賞俾其益知勸
勉

己丑

大學士于敏中等奏言查逆賊王倫糾眾滋擾罪
大惡極業經大學士舒赫德等統兵勦除所有臨
清舊城被賊佔住半月有餘居民遷避流亡室廬

積聚焚掠幾空作息經營荒廢日久仰蒙我

皇上軫念民依

特頒恩旨令大學士舒赫德巡撫楊景素等酌定善後

事宜六條具奏奉

旨命臣等會同速議具奏臣等謹逐一詳晰確核所有
招集流亡酌給房價加賑口糧緩徵正賦借領牛
具及逆匪產業入官估變以充公用等事宜均應
如大學士舒赫德等所奏辦理奏入得

旨依議速行

臣等謹按臨清舊城蕃庶之區經逆匪肆擾居
民奔竄荼毒實深幸賴

天戈奮勦立見掃除良民得安故壤至善後事宜亟需
布置我

皇上恩施軫恤迅不踰時使蕩析之餘旋獲寧宇招徠
賑貸備極周詳元氣既復而善良有更生之慶
厚澤深仁直符於疇載也已

同日何燭奏言臣於十月初二日准徐績咨稱逆
匪王樸供有王倫之徒壽張縣人張百祿在河南
遂平縣傳教又准姚立德札稱賊犯楊林供有壽
張縣人張北魯係逆犯王倫義子向在河南裕州
一帶傳教等語臣刻即飛札南汝道南陽汝寧兩
府密為查緝茲又欽奉

諭旨飭令迅速查拏臣復委署按察使周於智星馳前
往囑其督同道府地方各官密速辦理勿得稍涉

張皇再查裕州距遂平二百五十餘里張北魯張
百祿均係壽張縣之蔡家樓人音復相似是否一
人容臣確查審明奏覆奏入報

聞

同日舒赫德楊景素奏言查山東臨清一帶地方
經逆匪擾亂仰蒙

皇上德威遠播未及一旬首從勦滅又蒙
聖恩高厚蠲賦撫卹無不周至臣等仰體

皇仁自必盡心竭力以期辦理妥善惟是東省大局尚須整頓全賴大員董率辦理現在道府中如兗沂曹道松齡兗州府知府福森布東昌府知府李世法曹州府知府李絳俱係中材辦事亦少奮勉之概且松齡福森布李世法俱有此案失察處分臣楊景素因山東辦事乏人難收指臂之效面商臣舒赫德臣舒赫德查有吏部郎中忠德歷任道府老成練達刑部郎中赫紳泰明幹有才俱素所熟

悉者又隨臣查辦此案之軍機處行走兵部員外
章崇敏達精詳戶部員外敷倫泰安詳穩妥且深
曉此原委仰懇

皇上天恩將此四員發東交臣楊景素差遣委辦如能
得力即以緊要之缺酌量補用與地方實有裨益
奏入

上諭內閣曰舒赫德等所奏甚是忠德赫紳泰章崇敷
倫泰俱著發交山東巡撫楊景素差委遇有緊要道

府缺出酌量補用忠德赫紳泰並著即速起程前往
臣等謹按平賊之後民氣漸蘇仰賴

皇上德威蕩滌經理撫綏已無不至猶以地方瘡痍甫
復解絃整頓必資幹濟之才

特命更置道府諸員澄敘官方拊循凋敝用人安民之
道孰有加於此者乎

同日舒赫德拉旺多爾濟阿思哈奏言此次剿捕
逆匪蒙

皇上賞給東三省善射人五十名伊等自到臨清以來竭力奮勉除隨同音濟圖擒拏王倫負傷各人已遵

旨分別賞給伊等銀兩外其餘出力之人應將名單交各該處記名於應陞之處陞用以示鼓勵奏入報聞

同日舒赫德阿思哈楊景素又奏言查王倫義子十八人除王經隆一犯業已解京外閩吉祥李桐

李玉珍艾得見邵然趙大坊趙煥楊佩八名俱經
陸續拏獲趙玉佩一犯現經直隸拏獲臣等提訊
屬實又直隸解到景淑一犯亦訊係王倫義兒又
李得深現自壽張拏到係壽張縣書吏認王倫為
義父該犯雖未跟至臨清但前在壽張殺官時該
犯幫同守門丁若錦一犯據被獲伊子丁興禮供
稱在河沿上受鎗身死李贊一一犯據李桐供先
被鎗傷後經焚死李士傑已同王倫焚樓自斃其

張百祿一犯訊在河南遂平傳教已履行何燭查
拏此外惟溫炳趙傳二犯尚無下落現飭文武各
員實力查拏弗使一名漏網再十八人之外歷訊
拏獲各犯俱稱尚有鄰舉一犯亦係王倫義兒自
當一體嚴查務拏至李貴實係王倫乾壻為助惡
要犯臣等遵

旨將閻吉祥李桐李貴派健銳營委署前鋒叅領伯泰
帶京兵三十名即於本日押解赴京備訊至監禁

之王倫等親屬夥黨現在分別定擬罪名辦理至
賊匪有封開藥鋪人為御醫一節查有二開口開
藥鋪之外科醫生遲玉津曾為賊人看瘡因即差
役前往查拏先將遲玉津之子遲太來拘到據供
賊到臨清日曾叫我父親看傷父親不肯去賊就
要殺父親只得去看但並未從賊亦未受封御醫
後來大兵來到父親就逃往故城縣去小的長兄
被故城縣拏住父親現去保他去了等語臣楊景

素現已差弁往故城緝拏遲玉津嚴訊實情再行具奏又前據直隸開送獲犯名單內李忠一犯現交李桐識認指係徐克明前為王倫看門傳事官並非孟燦所供放為元帥之李忠但徐克明亦係要犯現在監禁一併定擬辦理奏入報

聞

同日周元理奏言臣連日審訊獲犯王得朋張八等據王得朋供係催與王倫家種地自搶劫壽張

該犯即趕送家眷車輛後又隨同一路打仗攻城
據張八供受偽號將軍自陽穀夥同逆匪殺人擡
縛縣官此二犯罪惡兇逆本應立即正法但訊該
犯等與王倫逆夥尚有認識自應解京聽候質審
臣即派委守備李成楷帶領勇幹弁兵將該二犯
嚴密押護星速到京以備提訊至臣訊據王得朋
張八供出張北魯於本年四月往河南白洋地方
傳教等語已飛咨何燭查拏務獲並據王得朋供

王倫義兒有趙忠趙宣其乾女壻有竇柱聶大成
張心智五犯現在飭屬嚴拏奏入報

聞

同日

上命軍機大臣傳諭舒赫德周元理楊景素曰舒赫德
等奏獲德州駐防兵新城一犯即行正法自應如此
辦理至潰逃之滿漢兵丁屢諭舒赫德查拏迄今日
久僅獲新城一名其餘豈竟毫無蹤跡著傳諭周元

理楊景素逮於所屬境內上緊緝拏務獲勿任久匿
漏網至河南雖距山東略遠恐或有潛逸往豫之人
並著何燭一體嚴密偵捕又王倫義兒十八人尚有
趙傳溫炳二犯未獲著舒赫德楊景素迅速嚴切查
拏解京毋使久稽顯戮又據王經隆李旺供隨同李
國貞前往搶船搭橋者尚有郭永教高珍楊福余會
韓福如李之貴楊樹常楊希葉李達皮之揚徐士姚
王立松十二人亦俱係此案要犯著即拏獲重究內

李達一犯前奏已經拏獲未知作何辦理並著查明覆奏又據梵偉供前所給與王倫銀鐲係壽張當夥王登雲給予亦入教隨往臨清其人曾否就獲並著楊景素即速查拏解京審訊又周元理奏據王得朋供出之趙忠等五犯並著楊景素一併嚴拏辦理

上又命軍機大臣傳諭舒赫德楊景素曰軍機大臣等審據李旺供稱有王貴一犯曾帶兵攻犯新城著傳諭舒赫德楊景素即速查拏務獲解京審辦又審據

王樸供王倫第四子王叔於逃走時失散恐其尚在
藏匿並著嚴拏解京審辦又王經隆供燒樓時有王
宗尼與壽張一人年輕者同下樓來被獲此二犯未
知作何下落又供有子正月兒帶在臨清舊城後來
不知逃往何處閻吉仁亦供有子憨小兒此等罪惡
深重之人豈容稍留餘孽並著舒赫德楊景素速飭
查拏獲時即行正法不得僅照緣坐辦理

上又命軍機大臣傳諭舒赫德周元理楊景素曰前經

降旨將徐績解任交舒赫德差遣已屬逾格施恩所
有一應查拏餘黨等事仍係徐績分所應辦況伊在
山東年久文武員弁皆其舊屬今雖解任何患呼應
不靈著將屢次傳諭舒赫德等應行緝拏要犯彙開
一單令舒赫德傳旨轉交徐績實力上緊緝拏倘果
能捕得要犯尚可稍贖罪愆徐績益當感發天良倍
加策勵以期努力自効

欽定勦捕臨清逆匪紀略卷十二